

LIGJI NR. 08/L-109**PËR KOMPENSIMIN E VIKTIMAVE TË KRIMIT****Kuvendi i Republikës së Kosovës,**

Në mbështetje të Nenit 65 (1) të Kushtetutës së Republikës së Kosovës,
Miraton:

LIGJ PËR KOMPENSIMIN E VIKTIMAVE TË KRIMIT**KAPITULLI I
DISPOZITAT E PËRGJITHSHME****Neni 1
Qëllimi**

1. Qëllimi i këtij ligji është të rregullojë funksionimin e Programit për kompensim të viktimave të krimit dhe procedurave që lidhen me këtë program.
2. Ky ligj është në pajtueshmëri me Direktivën e Këshillit 2004/80/EC të 29 prillit 2004 lidhur me kompensimin e viktimave të krimit.

**Neni 2
Fushëveprimi**

Ky ligj rregullon të drejtën e kompensimit financiar të viktimave të veprave të dhunshme penale dhe të vartësve të tyre, autoritetet vendimmarrëse si dhe procedurat për realizimin e të drejtës për kompensim në situatat vendore dhe tejkufitare.

**Neni 3
Përkufizimet**

1. Shprehjet e përdorura në këtë ligj kanë këtë kuptim:

1.1. **Viktimë e krimit** - viktimë ose i dëmtuari ashtu siç definohet me Kodin e Procedurës Penale;

1.2. **Viktimë e rastit** – personat të cilët aksidentalisht janë gjendur në vendin e ngjarjes, persona që janë lënduar duke i dalë në ndihmë viktimës ose policisë për të ndaluar kryerjen e një veprë penale ose për të kapur autorin e veprës;

1.3. **Viktimë e huaj e trafikimit** - shtetasi i huaj i identifikuar nga autoritetet e Kosovës si viktimë apo viktimë e supozuar e trafikimit;

1.4. **Vartësit** - personat e mbajtur nga viktimë e ndjerë dhe personat të cilët kanë pasur të drejtë me ligj që të kërkojnë të mbahen nga i ndjeri;

1.5. **Anëtar i familjes** - siç përcaktohet me Kodin Penal të Republikës së Kosovës;

1.6. **Fëmijë** - siç përcaktohet me Kodin Penal të Republikës së Kosovës;

1.7. **Dëmi** - dëmi për të cilën parashihet kompensimi sipas nenit 10 të këtij ligji;

1.8. **Shpërfytyrim** - kur viktimë si pasojë e veprës është deformuar apo shëmtuar;

1.9. **Parashtruesi i kërkesës** - personi i cili parashtron një kërkesë për kompensim me pretendimin se është viktimë e krimit. Ky term përfshin edhe personat tjerë të cilët mund të parashtrojnë kërkesë në emër të viktimës;

1.10. **Kërkesa** - kërkesa për kompensim nga Programi për Kompensimin e viktimave të krimit;

1.11. **Përfituesi** - personi i cili me vendim të komisionit përfiton nga e drejta për kompensim sipas këtij ligji;

1.12. **Komisioni** - Komisioni për Kompensimin e Viktimave të Krimit;

1.13. **Viktima e ndjeshme** - siç përcaktohet me Kodin Penal të Republikës së Kosovës;

1.14. **Territor i Republikës së Kosovës** - siç përcaktohet me Kodin Penal të Republikës së Kosovës;

1.15. **Trajtimi mjekësor** - medikamente dhe shërbime mjekësore, përfshirë edhe psikoterapi.

2. Për qëllime të këtij ligji, emrat e gjinisë mashkullore nënkuptojnë edhe gjininë femërore dhe anasjelltas.

Neni 4 Parimet e përgjithshme

1. Autoritetet e parapara me ligj duhet të sigurohen që viktima e krimit (në tekstin e mëtejshëm: viktima) të trajtohet me profesionalizëm, duke respektuar të drejtën në siguri, dinjitet, jetën private dhe familjare të tyre dhe duke njohur ndikimin negativ të krimit në viktimën.

2. Të drejtat e caktuara sipas këtij ligji vlejnë për viktimat në mënyrë jo-diskriminuese duke përfshirë edhe statusin e tyre të qëndrimit.

3. Sipas këtij ligji, viktima dhe vartësit e tyre nuk mund të marrin kompensim të dyfishtë në pajtim me nenin 19 të këtij ligji.

Neni 5 Dispozitat subsidiare

Në çështjet procedurale që nuk mbulohen nga ky ligj aplikohen dispozitat e Ligjit për procedurën e përgjithshme administrative.

KAPITULLI II E DREJTA PËR KOMPENSIMIN DHE LLOJET E KOMPENSIMEVE

Neni 6 Veprat e dhunshme të kompensueshme

1. Veprat e dhunshme të kompensueshme (në tekstin e mëtejshëm: veprat), janë të gjitha veprat që rezultojnë në:

1.1. vdekjen e viktimës;

1.2. lëndim të rëndë trupor;

1.3. dëmtim të rëndë të shëndetit fizik, apo;

1.4. dëmtim të shëndetit mendor.

2. Veprat penale kundër sigurisë së trafikut publik nuk mbulohen sipas këtij ligji edhe nëse kanë rezultuar në pasojat nga paragrafi 1 i këtij neni.

Neni 7

Kushtet formale dhe materiale

1. Kushtet formale për të drejtën në kompensim janë që:

1.1. vepra të jetë kryer brenda territorit të Republikës së Kosovës. Në rastet kur vepra apo një pjesë e veprës është kryer në territorin e Republikës së Kosovës dhe në territorin e shtetit apo shteteve tjera, kompensimi bëhet nga shteti në të cilin viktimat apo vartësit kanë banim të përhershëm;

1.2. për shtetasit e Republikës së Kosovës, vepra të jetë kryer jashtë territorit të Republikës së Kosovës, por viktimat të mos ketë pasur mundësinë e realizimit të kompensimit në vendin ku është kryer vepra penale. Kompensimi bëhet në pajtim me dispozitat e këtij ligji;

1.3. vepra të jetë zbuluar dhe raportuar tek autoriteti kompetent dhe të jetë trajtuar si vepër penale.

2. Në rast të vdekjes së viktimës së krimit si pasojë e veprës penale, anëtarët e familjes së viktimës mund të gëzojnë të drejtat në pajtim me dispozitat e këtij ligji.

3. Viktimat e rastit mund të gëzojnë të drejtën në kompensim nëse plotësojnë kriteret e caktuara me dispozitat e këtij ligji.

Neni 8

Kompensimi i menjëhershëm

1. Kërkesa për qasje të menjëhershme në kompensim mund të parashtrohet në rastet kur kemi të bëjmë me:

1.1. viktimat fëmijë;

1.2. viktimat e trafikimit me qenie njerëzore;

1.3. viktimat e dhunimit;

1.4. viktimat e veprave penale që bien brenda përkufizimit të dhunës në familje;

1.5. anëtarët e familjes së viktimës së ndjerë.

2. Llojet e kompensimeve që mund të paguhen sipas këtij neni përfshijnë kategoritë si në vijim:

2.1. shpenzimet e varrimit nga neni 16 paragrafi 1 të këtij ligji.

2.2. shpenzimet e paguara nga viktimat apo anëtarët e familjes në emër të viktimës të cilat mund të përfshijnë por nuk kufizohen me sa vijon:

2.2.1. shpenzimet nga nenet 11, 12 dhe 17 të këtij ligji;

2.2.2. shpenzime tjera të arsyeshme të cilat Komisioni vlerëson se mund të përfshihen në kompensim të menjëhershëm në lartësinë maksimale prej pesëqind (500) euro.

2.3. kompensimi sipas këtij neni nuk mund të tejkalojë shumën prej tremijë (3000) euro për totalin e të gjitha kategorive si më sipër.

3. Kushtet që mund të përcaktojnë nëse mund të jepet kompensim i menjëhershëm për kategoritë nga paragrafi 1 i këtij neni, përfshijnë por nuk kufizohen me sa vijon:

3.1. vepra penale është kryer ndaj viktimës së ndjeshme;

3.2. viktima është në gjendje të vështirë financiare; përfitues i ndihmës sociale ose në situatë të ngjashme.

4. Viktima e huaj e trafikimit mund t'ia paraqesë kërkesën Komisionit, gjatë kohës sa është ende në territorin e Republikës së Kosovës, sikurse edhe viktimat vendore. Në këtë rast viktima duhet të bashkëpunojë arsyeshëm me organet e drejtësisë, për hetimin dhe ndjekjen e kryesit të veprës penale.

5. Kompensimi sipas këtij neni nuk u mohon viktimave të drejtën e paraqitjes së kërkesës së rregullt për kompensim për kategoritë tjera të kompensimeve të parapara me këtë ligj apo për shumën e mbetur të kompensimit nga e njëjta kategori deri në maksimumin e paraparë me ligj.

6. Komisioni ruan të drejtën të shtyjë trajtimin e kërkesës për kompensim të paraqitur sipas këtij neni deri në ngritjen e kallëzimit penal apo aktakuzës, në rastet kur një pezullim i tillë i trajtimit të kërkesës është i nevojshëm për të përcaktuar se lëndimet e shkaktuara kanë rezultuar nga vepra e dhunshme. Pezullimi nuk duhet të ketë për rrjedhojë vonesa të paarsyeshme apo të vej në vështirësi financiare parashtruesin e kërkesës.

7. Komisioni mund të refuzojë kërkesën për kompensim sipas këtij neni nëse konsideron se të dhënat e siguruara nuk mbështesin mjaftueshëm kërkesën për kompensim të menjëhershëm.

Neni 9

Kërkesa e rregullt për kompensim

1. Kërkesa e rregullt për kompensim parashtrohet pas përfundimit të procedurës së rregullt gjyqësore, respektivisht pas plotfuqishmërisë së aktgjykimit.

2. Për të kërkuar kompensim të rregullt, parashtruesi i kërkesës është i obliguar që, të kërkojë fillimisht dëmshpërblim nga i pandehuri në procedurë penale në pajtim me Kodin e Procedurës Penale, përveç në rastet kur viktima dokumenton se e ka pasur të pamundur paraqitjen e një kërkesë të tillë.

3. Në rastet kur i pandehuri nuk e dëmshpërblen viktimën, viktima ka të drejtë të parashtrojë kërkesë për kompensim nga programi për kompensim të viktimave të krimit.

4. Në rastet kur i pandehuri vetëm pjesërisht dëmshpërblen viktimën, atëherë viktima ka të drejtë të parashtrojë kërkesë për kompensim shtesë nga programi për kompensim të viktimave të krimit.

5. Përveç rregullit nga paragrafët 1 deri 3 të këtij neni, parashtruesi i kërkesës ka të drejtë të kërkojë kompensim të rregullt edhe në rastet kur dëmshpërblimi nuk do të jetë i mundur të realizohet nga kryesi për shkak të rrethanave në vijim:

5.1. nëse vërtetohet se personi ka qenë viktimë por:

5.1.1. kryesi nuk është penalisht i përgjegjshëm;

5.1.2. kryesi është i panjohur;

5.1.3. kryesi ka vdekur;

5.1.4. ka ikur dhe është i paarritshëm për organet e drejtësisë;

5.1.5. kryesi është i paaftë të paguajë kompensimin, përfitues i ndihmës sociale ose në situatë të ngjashme;

5.1.6. kanë kaluar dy (2) vjet nga raportimi i veprës penale dhe nuk ka pasur ngritje të aktakuzës;

5.1.7. është arritur parashkrimi relativ apo absolut.

5.2. nëse përmbarimi i dëmshpërblimit të caktuar në procedurë gjyqësore është bërë i pamundur apo kur nga shkaqe tjera të parapara me legjislacionin në fuqi për shkak të cilave i njëjti nuk mund të zbatohet.

6. Kërkesa sipas këtij neni mund të parashtrohet edhe nëse parashtruesi i kërkesës paraprakisht ka kërkuar kompensim të menjëhershëm sipas nenit 8 të këtij ligji. Kjo vlen si në rastet kur iu është refuzuar kërkesa për kompensim të menjëhershëm, po ashtu edhe kur kompensimi iu është dhënë vetëm për disa nga kategoritë, respektivisht shpenzimet e parapara me këtë ligj.

Neni 10 **Llojet e kompensimeve**

1. Llojet e kompensimeve sipas këtij ligji janë:

1.1. kompensimi për lëndim fizik apo dëmtimit të shëndetit;

1.2. kompensimi për dëmtim të shëndetit mendor;

1.3. kompensimi për vuajtje psikike;

1.4. kompensimi për vuajtje psikike për humbjen e anëtarit të familjes;

1.5. kompensim për humbjen e të drejtës në mbajtje;

1.6. kompensim për shpenzimet e varrimit;

1.7. kompensim për dëmtimin apo shkatërrimin e pajisjeve mjekësore.

2. Viktimat kanë të drejtën e parashtrimit të kërkesës për një ose me tepër lloje të kompensimit të përcaktuara me ligj.

3. Qeveria e Republikës së Kosovës, nxjerr udhëzim administrativ për mënyrën e kompensimit, përfshirë edhe llogaritjen e kompensimit për dëmtime të shumëfishta.

Neni 11 **Kompensimi për lëndim fizik apo dëmtim të shëndetit**

1. Kompensimi sipas këtij neni do të jepet për dhimbjet fizike dhe dhembje shpirtërore dhe si rrjedhojë edhe zvogëlimit të aktivitetit jetësor të shkaktuara si pasojë e lëndimit fizik, dëmtimit të shëndetit apo sëmundjeve që kanë rezultuar nga kryerja e veprës penale.

2. Kompensimi sipas këtij neni nuk do të njihet për rastet kur viktimat e krimit është paaftësuar përkohësisht apo për të cilat është paaftësuar në një shkallë më të ulët.

3. Kompensimi përcaktohet duke marrë parasysh rrethanat e rastit, shkallën e dhimbjes së

shkaktuar nga lëndimi apo dëmtimin e shëndetit, kohëzgjatja e dhimbjes dhe në përputhje me parimin e kompensimit të drejtë monetar. Shuma fikse për kompensim përcaktohet në pajtim me shkallët e mëposhtme:

3.1. lëndimet, dëmtimet apo sëmundjet mesatarisht të rënda që zgjasin më shumë se gjashtë (6) javë, të cilat rezultojnë në paaftësi për atë periudhë, duke i pamundësuar realizimin e të hyrave. Kompensimi do të jepet në një shumë të vetme, duke llogaritur jo më shumë se njëqind e pesëdhjetë (150) euro në muaj nga paraqitja e lëndimit apo dëmtimit sipas këtij neni, por në asnjë rast, duke mos e kaluar shumën maksimale prej dy mijë (2,000) euro;

3.2. lëndimet, dëmtimet apo sëmundjet e rënda me pasoja të dukshme ose funksionale, afatgjate apo të përhershme, apo të cilat kanë qenë objektivisht kërcënuese për jetën. Llogaritja e kompensimit për këtë kategori bëhet në pajtim me nënparagrafin 3.1 të këtij neni, duke mos e kaluar shumën maksimale prej katërmijë (4000) euro.

4. Përveç kompensimit nga paragrafi 3 i këtij neni, viktimat apo vartësit e tyre të cilët kanë bartur shpenzimet e hospitalizimit, medikamenteve dhe shërbimeve tjera përcjellëse të domosdoshme për trajtim të viktimave iu njihet e drejta në kompensim deri në shumën maksimale prej pesë mijë (5,000) euro, gjithnjë përderisa mund të dokumentojnë ato shpenzime.

5. Përrjashtimisht, nëse komisioni pa varësisht nga lloji i lëndimit, dëmtimit, apo sëmundjes dhe medikamenteve apo shërbimeve tjera përcjellëse të marra e sheh të arsyeshme, mundet, me votë unanime, të rris maksimumin e kompensimit deri në dhjetë mijë (10,000) euro.

Neni 12

Kompensimi për dëmtim të shëndetit mendor

1. Kompensimi për dëmtim të shëndetit mendor paguhet vetëm kur është shkaktuar nga një vepër e dhunshme.

2. Dëmtimi i shëndetit mendor nuk përfshin gjendjen e paaftësisë, zhvillimit të vonshëm mendor, çrregullimit të përkohshëm apo gjendje të tilla të ngjashme. Pasoja duhet të jetë në atë shkallë që të ndikojë në aktivitetet e zakonshme të viktimës apo gjendjen psikologjike të tij/saj për një periudhë të zgjatur kohore dhe viktimat të ketë nevojë për trajtim të vazhdueshëm.

3. Kompensim deri në vlerën prej tremijë (3000) euro mund të jepet për:

3.1. shpenzimet e dokumentuara për shërbimet e specialistëve për trajtimin ambulator për sanimin e gjendjes së krijuar;

3.2. shpenzimet e projektuara për shërbimet e parapara për sanimin e gjendjes së krijuar, nëse konstatohet nga specialistët e fushës se dëmtimi është i natyrës së tillë që kërkon trajtim të vazhdueshëm;

3.3. shpenzimet e hospitalizimit, medikamenteve dhe shërbimeve tjera përcjellëse.

4. Nëse shërbimet e trajtimit për dëmtim të shëndetit mendor nga paragrafi 3 i këtij neni, nuk mund të realizohen në institucionet publike të shëndetit mendor, Komisioni mund të kërkojë kontraktimin e institucioneve private që ofrojnë këto shërbime.

5. Komisioni mund të shqyrtojë edhe një kërkesë të dytë për kompensim sipas paragrafit 3 të këtij neni, të dorëzuar nga parashtruesi, pas pranimit të shërbimeve të parapara me këtë nen, nëse për shkak të dëmtimit të shëndetit mendor i njëjti ka nevojë t'i nënshtrohet tretmanëve të vazhdueshme përtej atyre të pranuar apo të projektuara fillimisht nga specialistët apo Komisioni. Lartësia e kompensimit sipas kërkesës shtesë nuk mund të tejkalojë dyfishin e shumës së paraparë me këtë nen.

6. Kompensimi nga ky nen mund të përfshijë edhe kompensimin nga neni 11, paragrafi 3 të këtij ligji, në rastet kur pasoja e shkaktuar e kualifikon viktimën për kompensim.

Neni 13 **Kompensimi për vuajtje psikike**

1. Kompensimi për vuajtje psikike si pasojë e veprës penale mund t'u jepet viktimave të:

- 1.1. viktimat fëmijë;
- 1.2. dhunës në familje të cilat iu janë nënshtruar dhunës psikike, seksuale, fizike dhe ekonomike;
- 1.3. viktimave të trafikimit me qenie njerëzore;
- 1.4. viktimave të dhunimit, sulmit seksual, degradimit të integritetit seksual apo detyrimit në pornografi;
- 1.5. viktimat të cilat iu janë nënshtruar shpërftyrimit, torturave të vazhdueshme, abuzimeve psikike, seksuale dhe fizike në mënyrë të vazhdueshme apo kufizimit të lirisë dhe si rezultat kanë pësuar traumë në atë shkallë sa të ketë ndikuar rëndë në gjendjen, sjelljen dhe personalitetin e viktimës.

2. Vuajtja psikike nënkupton shqetësimin emocional, traumën psikologjike, ndjenjën e pashpresës e të pafuqisë, turpin, humbjen e kënaqësisë për jetë dhe shqetësime tjera të natyrës psikologjike që rezultojnë si pasojë e veprës penale dhe mund të ndikojnë në aspektin emocional, njohës dhe sjelljen e personit. Vuajtja psikike do të përcaktohet duke marrë parasysh rrethanat e rastit, llojin e veprës penale, nivelin dhe kohëzgjatjen e shqetësimit si dhe faktorë tjerë relevant.

3. Kompensimi sipas këtij neni jepet në shumë fikse prej dymijë (2000) euro.

Neni 14 **Kompensimi për vuajtje psikike për humbjen e anëtarit të familjes**

1. Të drejtë kompensimi sipas këtij neni kanë anëtarët e familjes së viktimës së ndjerë.
2. Kompensimi sipas këtij neni bëhet në pajtim me nenin 12, paragrafin 3 të këtij ligji, dhe nuk mund të tejkaloj shumën prej tremijë (3000) euro në total për të gjithë anëtarët e familjes së viktimës.

Neni 15 **Kompensimi për humbjen e të drejtës në mbajtje**

1. Vartësit kanë të drejtë të parashtrojnë kërkesë për kompensim për humbjen e të drejtës në mbajtje në ato raste kur mund të dokumentojnë se i ndjeri ka qenë kontribues në mbajtjen e tyre.
2. Kompensimi sipas këtij neni jepet në pajtim me kategorizimin e lëndimeve dhe dëmtimeve sipas nenit 11, paragrafi 3 i këtij ligji dhe në asnjë rast nuk do të kalojë shumën maksimale prej tre mijë (3,000) euro për të gjithë vartësit.

Neni 16 **Kompensimi i shpenzimeve të varrimit**

1. Anëtarët e familjes së viktimës së ndjerë kanë të drejtë në kompensim për shpenzimet e varrimit. Kompensimi sipas këtij neni paguhet në shumë fikse prej një mijë (1,000) euro.

2. Kompensimi për shpenzimet nga paragrafi 1 i këtij neni, mund të kërkohej si pjesë e kërkesës për kompensim të menjëhershëm ose të rregullt. Parashtruesi i kërkesës duhet të posedojë autorizimin e anëtarëve të tjerë të familjes për tërheqjen e këtij kompensimi.

3. Përveç kompensimit të paraparë me paragrafin 1 të këtij neni parashtruesi i kërkesës mund të kërkojë edhe kompensim për shpenzimet e transportimit të kufomës së viktimës nga një shtet tjetër. Shpenzimet rreth këtij transporti duhen të jenë të dokumentuara.

Neni 17

Kompensim për dëmtimin apo shkatërrimin e pajisjeve mjekësore

1. Parashtruesi i kërkesës kompensohet për pajisjet mjekësore të domosdoshme për shëndetin e viktimës dhe të cilat pajisje janë dëmtuar si pasojë e veprës së dhunshme nga e cila ka rezultuar edhe dëmtimi i viktimës.

2. Kompensimi sipas këtij neni nuk do të kalojë shumën maksimale prej tremijë (3,000) euro.

Neni 18

Rrethanat që ndikojnë në kompensim

1. Kompensimi mund të zvogëlohet ose të refuzohet:

1.1. në varësi të kontributit të viktimës në shkaktimin e dëmit apo në përkeqësimin e dëmtimit të shkaktuar;

1.2. në varësi të sjelljes së viktimës para, gjatë ose pas veprës penale;

1.3. në varësi të përfshirjes së viktimës në krimin e organizuar apo të anëtarësisë së tij në një organizatë që përfshihet në krim të dhunshëm;

1.4. nëse dhënia e plotë apo e pjesshme e kompensimit është në kundërshtim me kuptimin e drejtësisë, moralit apo rendit publik.

Neni 19

Marrja parasysh e kompensimeve të tjera

1. Shuma e kompensimit për një lloj të caktuar të dëmit sipas këtij ligji do të zvogëlohet për pjesën e shërbimeve të mbuluara falas nga institucionet shëndetësore publike, dëmshpërblim të pranuar nga kryesi, kompensimin të pranuar nga sigurimi shëndetësor publik apo privat, kompensimin nga fondet tjera publike, apo kompensimin të pranuar nga programet tjera të kompensimit brenda ose jashtë vendit nëse janë mbuluar në emër të të njëjtit dëm respektivisht nga e njëjta bazë.

2. Në vendimin për kompensim Komisioni do të marrë parasysh edhe cilindo dëmshpërblim të urdhëruar nga gjykata që vendos në çështjen penale për veprën për të cilin kërkohej kompensimi, përveç nëse ai dëmshpërblim nuk është paguar.

Neni 20

Bartja e së drejtës në kompensim

1. E drejta në paraqitjen e kërkesës për kompensim nuk bartet tek vartësit në rast të vdekjes së viktimës pas paraqitjes së kërkesës për kompensim.

2. Përjashtimisht nga paragrafi 1 i këtij neni, në rastet kur viktimë e krimit ka kërkuar kompensim për lëndimet që iu janë shkaktuar si pasojë e veprave të dhunshme, por në ndërkohë i njëjti vdes jo si pasojë e atyre lëndimeve, anëtari i familjes së të ndjerit ka të drejtë në kompensim në rast të plotësisë kumulativ të kushteve të mëposhtme:

2.1. nëse Komisioni para vdekjes së viktimës ka marrë vendimin përfundimtar për kompensim të viktimës për lëndim, por ende nuk është bërë transferi i shumës së kompensimit në llogarinë e viktimës;

2.2. nëse anëtari i familjes ka qenë financiarisht i varur nga i ndjeri dhe nuk ka burime tjera të mbajtjes.

KAPITULLI III AUTORITET KOMPETENTE

Neni 21

Komisioni për kompensimin e viktimës së krimit

1. Komisioni për kompensim të viktimave të krimit emërohet nga Qeveria e Republikës së Kosovës me këtë përbërje:

1.1. një (1) gjyqtar i Gjykatës Supreme, si kryetar i Komisionit, i propozuar nga Këshilli Gjyqësor i Kosovës;

1.2. një (1) përfaqësues nga shoqëria civile me njohuri në fushën e mbrojtjes së viktimave, anëtar, i propozuar nga Ministri i Drejtësisë, i përkrahur nga së paku pesë (5) organizata të shoqërisë civile në fushën e të drejtave të njeriut dhe të drejtave të viktimave;

1.3. një (1) anëtar nga radhët e mjekëve të licencuar në fushën e psikiatrisë të propozuar nga Oda e Mjekëve të Kosovës;

1.4. udhëheqësi i njësisë administrative të Komisionit është anëtarë pa të drejtë vote. Përfshirë në mungesë të kuorumit, Udhëheqësi i njësisë ka të drejtën e votës.

2. Mandati i anëtarëve të Komisionit është (3) tri vite. Mandati i kryetarit të Komisionit është katër (4) vite. Anëtarët e Komisionit, përfshirë edhe kryetarin mund të rizgjidhen edhe për një mandat shtesë.

3. Përbërja e Komisionit do të ketë parasysh kuotën gjinore dhe etnike.

Neni 22

Pushimi dhe shkarkimi nga funksioni i anëtarit të Komisionit

1. Anëtarëve të Komisionit u pushon funksioni i anëtarit me:

1.1. vdekje;

1.2. humbjen e zotësisë për veprim për më shumë se tre (3) muaj për shkak të arsyeve mjekësore të vërtetuara;

1.3. dështimin e vazhdueshëm për të marrë pjesë në veprimtaritë e Komisionit për më shumë se tre (3) muaj;

1.4. pushimin e statusit mbi të cilin bazohet caktimi si anëtar;

1.5. skadimin e mandatit;

1.6. dorëheqje duke informuar Komisionin me njoftim paraprak prej tridhjetë (30) ditësh.

2. Anëtarët e Komisionit shkarkohen nga funksioni para skadimit të mandatit për të cilin është zgjedhë nëse veprimet e tij e bëjnë të padenjë ushtrimin e funksionit të anëtarit të Komisionit

në raste kur anëtari:

2.1. kryen detyrat në Komision në mënyrë të pandërgjegjshme, dhe;

2.2. dënohet për vepër penale.

3. Nëse një vend në Komision lirohet para skadimit të mandatit të një anëtari, pozita e lirë plotësohet në të njëjtën mënyrë si për anëtarin të cilit i ka skaduar mandati.

Neni 23

Kryerja e detyrave nga Komisioni

1. Komisioni vendosë për kërkesat për kompensim në mbledhjet e thirrura nga Kryetari.

2. Sipas nevojës Komisioni mund të intervistojë apo kërkojë raport me shkrim nga zyrtarë përkatës, të cilët kanë qenë të përfshirë gjatë procedurës penale në rast dhe mund të kenë njohuri për ndikimin e veprës në viktimën.

3. Komisioni gjatë vendimmarrjes ka diskrecion si në vijim:

3.1. tejkallimin e shumave maksimale siç parashihet për kategoritë e veçanta të kompensimit, në rastet kur shpenzimet e dokumentuara janë të arsyeshme.

3.2. caktimin e lartësisë së kompensimit sipas nenit 8, nënparagrafi 2.2.2 dhe nenit 11, paragrafi 5, të këtij ligji.

3.3. vazhdimin e afatit për dorëzim të kërkesës apo plotësimeve të kërkuara në rastet kur është qartësisht e arsyeshme se një vonesë e tillë ka qenë e pashmangshme.

4. Anëtarëve të Komisionit për punën e tyre u takon e drejta në shpërblim në pajtim me vendimin e qeverisë.

5. Komisioni do të miratojë rregulloren e punës për mënyrën e funksionimit të tij, rolin dhe detyrat e njësive mbështetëse dhe komunikimin mes tyre.

Neni 24

Përfshirja dhe kundërshtimi

Dispozitat e Ligjit të procedurës kontestimore të cilat vlejnë për përfshirjen e gjyqtarëve janë të aplikueshme në mënyrë analoge edhe për anëtarët e Komisionit për kompensim.

Neni 25

Mbështetja nga njësia administrative e Komisionit

1. Ministria e Drejtësisë do të sigurojë mbështetjen administrative-teknike për Komisionin (tutje: Njësia).

2. Njësia është përgjegjëse për pranimin dhe shqyrtimin paraprak të kërkesave si në vijim:

2.1. nëse kërkesa është dorëzuar në afatin e përcaktuar me ligj;

2.2. nëse kërkesa përmban ndonjë mangësi, është e pakompletuar apo e pakuptueshme.

3. Nëse kërkesa është e pasafatshme, Njësia e njofton Kryetarin e Komisionit dhe parashtuesin për refuzimin e kërkesës.

4. Në rastet nga nënparagrafi 2.2. i këtij neni, Njësia komunikon me parashtuesit e kërkesave

për t'u kërkuar të dhënat shtesë dhe korigjimet e nevojshme. Afati i përcaktuar për korigjimin e një mangësie në një kërkesë të pakompletuar dhe të pakuptueshme, nuk është më i shkurtër se tridhjetë (30) ditë. Nëse kërkesa nuk plotësohet edhe pas afatit shtesë, Komisioni merr vendim për refuzim të rastit.

5. Njësia pas shqyrtimit paraprak të kërkesës, mund të udhëzojë parashtruesin se në bazë të dokumentacionit të prezantuar, i njëjti mund të bëjë plotësimin e kërkesës duke aplikuar edhe për kategorinë përkatëse të kompensimit për shqyrtim nga Komisioni.

6. Njësia është përgjegjëse edhe për komunikimin me autoritetet kompetente për sigurimin e informatave të nevojshme.

7. Detyrat dhe përgjegjësitë e veçanta të Njesisë përcaktohen me Rregulloren për organizimin e brendshëm dhe sistematizimin e vendeve të punës të Ministrisë së Drejtësisë.

Neni 26 **Obligimi për të siguruar informata**

1. Secili institucion i cili bie në kontakt me viktimën, ka për obligim të informojë atë për të drejtën në kompensim sipas këtij ligji.

2. Ministria e Drejtësisë do të publikojë në faqen e saj të internetit informatat e nevojshme për të kërkuar kompensim, formularët për paraqitje të kërkesës dhe udhëzimet tjera të nevojshme për të gjitha situatat vendore dhe tejkufitare. Ministria e Drejtësisë do të bëjë publike informacione në lidhje me programin për kompensim. Të gjitha informatat do të publikohen në pajtim me Ligjin për përdorimin e gjuhëve si dhe në gjuhën angleze.

3. Ministria e Drejtësisë në rast nevoje, do të ofrojë udhëzime të përgjithshme për parashtruesit e kërkesës. Udhëzimet do të përfshijnë informatat se si do të plotësohet aplikacioni dhe çfarë dokumentacioni mbështetës mund të jetë i nevojshëm.

4. Ministria e Drejtësisë, kurdo që është e nevojshme, do të sigurojë shkëmbimin e informatave me autoritetet kompetente të shteteve tjera, sipas rregulloreve të shteteve përkatëse kompetente për kryerje të detyrave në procedurat e kompensimit të kërkesave. Ministria e Drejtësisë do të ofrojë asistencë dhe të kërkojë zgjidhje adekuate lidhur me zbatimin e dispozitave në situatat tejkufitare.

5. Me kërkesë të Komisionit, policia i siguron Komisionit të dhëna mbi veprën penale nga e cila pretendon se ka pësuar viktima.

6. Institucionet shëndetësore, sociale, policia, prokuroria, gjykatat dhe institucionet tjera të nivelit lokal dhe qendror duhet t'i vendosin në dispozicion në vende publike informata rreth programit të kompensimit.

KAPITULLI IV **PROCEDURAT E KËRKIMIT TË KOMPENSIMIT**

Neni 27 **Dorëzimi i kërkesës për kompensim**

1. Kërkesa për kompensim dorëzohet në Ministrinë e Drejtësisë, adresuar Njesisë përkatëse për mbështetje Komisionit për Kompensim të Viktimave të Krimit.

2. Kërkesa e plotësuar së bashku me dokumentacionin përkatës dorëzohet në adresë të Komisionit për kompensim në Ministrinë e Drejtësisë në njërën nga mënyrat si më poshtë:

2.1. drejtpërdrejtë;

2.2. me postë;

2.3. me postë elektronike (e-mail).

3. Për plotësimin e kërkesës për kompensim, viktimat e krimit mund të kërkojnë ndihmën e mbrojtësit të viktimave apo organizatave joqeveritare që ofrojnë ndihmë juridike falas për viktimat.

4. Në rast të angazhimit të avokatit privat për plotësimin dhe dorëzimin e kërkesës për kompensim, Komisioni nuk do të kompensojë parashtruesin e kërkesës për tarifën e kërkuar nga avokati privat.

5. Komisioni, në pajtim me dispozitat e Kodit të Procedurës Penale, mund të shqyrtojë edhe kërkesat për kompensim të referuara nga Gjykata.

6. Parashtruesit në procedurat e kompensimit janë të përjashtuar nga çdo tarifë.

7. Ministria e Drejtësisë do të përgatisë formularët standard të kërkesës për kompensim nga nenet 8, 9 dhe 34 të këtij ligji.

8. Viktima e krimit do të jep pëlqim për procesim të të dhënave personale përkatëse dhe të dhënave të ndjeshme personale për qëllim të vlerësimit të kërkesës për kompensim.

9. Nëse viktima e krimit është e penguar për të dhënë pëlqim për shkak të dëmtimit fizik apo psikik, konsiderohet se të drejtën e dhënies së një pëlqimi të tillë e ka përfaqësuesi ligjor i viktimës.

10. Parashtruesi i kërkesës deklaron se nuk ka të drejtë të kërkojë kompensimin nga burime tjera.

11. Vërtetësia e deklaratave në kërkesë i nënshtrohet dispozitave përkatëse që i referohen deklaramit të rremë të Kodit Penal.

12. Kërkesa duhet të dorëzohet në gjuhën shqipe apo serbe për viktimat vendore, ndërkohë për situatat tejkuftare vendore është i pranueshëm edhe versioni në gjuhën angleze.

Neni 28

Dokumentet që duhet bashkëngjitur kërkesës për kompensim

1. Kërkesës së parashtruar në pajtim me nenin 8 të këtij ligji, i bashkëngjiten dokumentet në vijim:

1.1. çfarëdo dokumenti të lëshuar nga policia i cili dokumenton se vepra penale është zbuluar, raportuar dhe trajtuar, përfshirë edhe cilësimin si viktimë e veprës penale;

1.2. dëshminë mbi gjendjen financiare të parashtruesit të kërkesës.

2. Kërkesës së parashtruar në pajtim me nenin 9, paragrafët 1 deri 4 të këtij ligji duhet ti bashkëngjitet vendimi i plotfuqishëm.

3. Kërkesës së parashtruar në pajtim me nenin 9, paragrafin 5 të këtij ligji, për të vërtetuar këto situata, duhet ti bashkëngjitet vendim apo ndonjë dokument tjetër zyrtar.

4. Përpos dokumenteve të specifikuar në paragrafët 1, 2 dhe 3 të këtij neni, kërkesës së bashkëngjiten edhe dokumentet në vijim:

- 4.1. dokumentin e identifikimit. Në rast të një viktime të trafikimit, kur viktima nuk posedon dokumente identifikuese, identiteti i viktimës konstatohet në bazë të raportit të policisë respektivisht nga aktgjykimi i gjykatës kompetente që ka trajtuar çështjen penale;
- 4.2. autorizimi për parashtruesin e kërkesës në rastet kur ky person kërkon kompensimin në emër të viktimës apo vartësve të viktimës;
- 4.3. raportet përkatëse mjekësore dhe dokumentet apo prova tjera të besueshme që dëshmojnë që viktima e krimit ka pësuar lëndim trupor, dëmtim të shëndetit apo vuajtje, përpos rasteve nga paragrafi 2 i këtij neni;
- 4.4. dëshmitë e shpenzimeve kur ky dokumentim kërkohet sipas kategorisë së caktuar;
- 4.5. çertifikatën e bashkësisë familjare në rastet kur kërkesa për kompensim parashtrohet nga vartësit, respektivisht anëtarët e familjes së viktimës;
- 4.6. dokument që dëshmon që viktima ka qenë kontribues në mbajtjen e familjes, në rastet kur kërkohet kompensim për humbjen e të drejtës në mbajtje;
- 4.7. dokumentet tjera relevante në mbështetje të kërkesës për kompensim.

5. Dokumentet e hartuara në ndonjë gjuhë të huaj, përveç gjuhës angleze, do të shoqërohen me përkthim në gjuhën shqipe apo serbe.

Neni 29

Afati për dorëzimin e kërkesës

1. Kërkesa për kompensim të menjëhershëm nga neni 8 i këtij ligji, mund të dorëzohet brenda afatit prej tre (3) vjetësh nga raportimi i veprës penale tek autoritetet kompetente.
2. Kërkesa për kompensim të rregullt nga neni 9 i këtij ligji, mund të dorëzohet brenda afatit prej tre (3) vjetësh nga:
 - 2.1. pranimi i aktgjykimit të plotfuqishëm;
 - 2.2. pranimi i njoftimit nga ana e parashtruesit për ekzistimin e rrethanave nga neni 9, paragrafi 5 i këtij ligji.
3. Nëse viktima është nën moshën tetëmbëdhjetë (18) vjeçare, afatet sipas paragrafëve 1 dhe 2 të këtij neni do të fillojnë të rrjedhin pasi viktima të mbushë moshën tetëmbëdhjetë (18) vjeçare.
4. Përrjashtimisht, nëse viktima për shkak të dëmtimeve trupore, apo shkaqeve tjera të arsyeshme që pamundësojnë dorëzimin e kërkesës, nuk është në gjendje të dorëzojë kërkesën e tij deri në afatin e përcaktuar me këtë nen, ai/ajo do të dorëzojë kërkesën më së voni brenda tre (3) muajsh nga dita kur arsyet për të cilat ai nuk ka qenë në gjendje të dorëzojë kërkesën kanë pushuar së ekzistuari.

Neni 30

Marrja e vendimeve lidhur me kërkesën

1. Vendimet e Komisionit merren me shumicë votash.
2. Komisioni do të:
 - 2.1. pranojë kërkesën në tërësi apo pjesërisht dhe të caktojë lartësinë e kompensimit, apo;
 - 2.2. refuzojë kërkesën si të pabazuar.

3. Komisioni mund të mbajë mbledhje kur janë prezent 2/3 e anëtarëve.
4. Për kërkesën për kompensim të menjëhershëm nga neni 8 i këtij ligji, Komisioni merr vendim brenda tridhjetë (30) ditësh nga dita e pranimi të dokumentacionit të plotë.
5. Për kërkesën për kompensim të rregullt nga neni 9 i këtij ligji, Komisioni merr vendim brenda nëntëdhjetë (90) ditësh nga dita e pranimi të dokumentacionit të plotë.
6. Një kopje e vendimit do t'i dërgohet parashtruesit të kërkesës dhe gjykatës kompetente.
7. Nëse viktimi e krimit është fëmijë, apo person pa aftësi të veprimit, një kopje e vendimit do t'i dërgohet kujdestarit ligjor.
8. Pala e pakënaqur ndaj vendimit të Komisionit mund të iniciojë konflikt administrativ në pajtim me legjislacionin përkatës në fuqi.
9. Vendimi për njohjen e të drejtës në kompensim do të përmbajë edhe klauzolën për transferimin e kërkesës sipas nenit 40 të këtij ligji, ndaj kryesit, nga përfituesi në buxhetin e Republikës së Kosovës deri në lartësinë e kompensimit të dhënë.

Neni 31 Bartja e mjeteve

1. Mjetet financiare në rastet e ekzekutimit barten ekskluzivisht tek përfituesi.
2. Mjetet financiare për viktimat fëmijë barten tek përfaqësuesi ligjor.
3. Ekzekutimi i mjeteve financiare bëhet në pajtim me legjislacionin në fuqi.

Neni 32 Transmetimi dhe qasja në të dhëna

1. Administratorët e bazave të të dhënave të informacionit personal, autoritetet shtetërore, autoritetet e komuniteteve lokale dhe organet që ushtrojnë kompetenca publike të cilat posedojnë të dhëna mbi rrethanat dhe faktet e rëndësishme për vendimmarrje, duhet të transferojnë të dhënat e lartpërmendura te Komisioni çdoherë kur kjo kërkohet me shkrim.
2. Pas një kërkesë me shkrim nga Komisioni, të dhënat mbi rrethanat dhe faktet e rëndësishme për vendimmarrje gjithashtu mund t'i dorëzohen vullnetarisht Komisionit nga individët në posedim të të dhënave.
3. Qasja në përmbajtjen e aktakuzës, dokumentet përcjellëse, raportet e Prokurorisë së Shtetit dhe vendimet e gjykatës, të cilat i posedon Komisioni për qëllime të vendimmarrjes, mund t'u vihen në dispozicion vetëm anëtarëve të Komisionit, zyrtarëve të Njësisë mbështetëse të Komisionit që trajtojnë kërkesën, viktimës apo përfaqësuesit të tij ligjor, përfaqësuesit të autorizuar dhe autoriteteve kompetente shtetërore.

KAPITULLI V PROCEDURAT NË SITUATAT TEJKUFITARE

Neni 33 Situatat tejkufitare

1. Situatat tejkufitare përfshijnë situatat tejkufitare vendore, situatat tejkufitare të huaja, përfshirë edhe situatat nga neni 7 nënparagrafi 1.2, të këtij ligji.

2. Situatë tejkuftare vendore është situata kur vepra është kryer në territorin e Republikës së Kosovës. Në këtë rast Komisioni i themeluar sipas këtij ligji është në rolin e autoritetit vendimmarrës ndërkaq kërkesa për kompensim nga ana e viktimës së huaj dorëzohet përmes autoritetit asistues të shtetit të huaj, shtetas i së cilës është viktimja e huaj.

3. Situatë tejkuftare e huaj është situata kur vepra është kryer në një shtet tjetër ku e drejta në kompensim përcaktohet me vendim të autoritetit vendimmarrës të atij shteti. Parashtruesi i kërkesës në këtë rast është shtetasi i Republikës së Kosovës, ndërkaq Komisioni mund të shërbejë në rolin e autoritetit asistues dhe është përgjegjës për transmetimin e kërkesave të parashtruesit të kërkesës autoritetit të huaj vendimmarrës.

Neni 34 **Situatat tejkuftare vendore**

1. Me të pranuar kërkesën nga autoriteti kompetent i një shteti të huaj, shtetas i së cilës është parashtruesi i kërkesës, Komisioni do t'i komunikojë autoritetit përkatës të shtetit të huaj, brenda tridhjetë (30) ditëve informatat në vijim:

- 1.1. konfirmimin për marrjen e kërkesës;
- 1.2. të dhënat e personit kontaktues, apo departamentit përgjegjës për çështjen;
- 1.3. nëse është e mundur, një afat të përafërt kur do të merret një vendim mbi kërkesën.

2. Ministria e Drejtësisë do të hartojë formular të veçantë të kërkesës për situatat tejkuftare vendore.

3. Nëse kërkesa e pranuar nuk është dërguar në formularin standard të përcaktuar nga Ministria e Drejtësisë apo kërkesa nuk është e kompletuar, e njëjta do t'i kthehet për plotësim autoritetit nga e ka pranuar atë.

4. Nëse kërkesa dhe dokumentet e bashkëngjitura nuk janë në gjuhën shqipe, serbe apo angleze, Komisioni do t'ia kthejë ato parashtruesit të kërkesës ose autoritetit nga i ka pranuar ato, të shoqëruara nga një udhëzim për përdorimin e gjuhës shqipe, serbe apo angleze.

5. Të gjitha kërkesat dhe dokumentet që transmetohen gjatë komunikimit në mes të autoriteteve në situata tejkuftare, duhet të përjashtohen nga çdo lloj i verifikimit autentik apo formaliteti ekuivalent.

6. Nëse Komisioni zbulon në një situatë tejkuftare vendore që vendimi për këtë çështje përkatëse kërkon procedura të veçanta, sikur dëgjimin e viktimës së krimit, dëshmitarit ose ekspertit, mund të kërkojë nga autoriteti i huaj asistues në të cilën parashtruesi i kërkesës ka paraqit kërkesën e tij për kompensim, për të kryer procedurat përkatëse, me kusht që personi që dëgjohej të pajtohet për seancën dëgjimore apo intervistën e tillë.

7. Seanca dëgjimore e kërkuar në procedurën përkatëse gjithashtu mund të kryhet edhe nëpërmjet video-konferencës apo tele-komunikimit, me kusht që personi që dëgjohej të pajtohet.

8. Seanca e referuara në paragrafin e mësipërm do të kryhet nga Kryetari i Komisionit ose nga anëtarë të Komisionit, i autorizuar në përputhje me rrethanat nga Kryetari i Komisionit.

9. Vendimi i Komisionit do t'i dërgohet autoritetit asistues të shtetit të huaj dhe parashtruesit të kërkesës direkt apo përmes këtij autoriteti.

Neni 35

Situatat tejkufitare të huaja

1. Në rast të situatës tejkufitare të huaj parashtruesi i kërkesës mund të paraqesë kërkesën e tij për Komisionin duke përdorur formularin standard të përcaktuar me nenin 34, paragrafin 2 të këtij ligji.
2. Sa më parë që është e mundur, Komisioni do të dërgojë kërkesën bashkë me dokumentet përcjellëse autoritetit kompetent të shtetit prej ku parashtruesi i kërkesës kërkon kompensimin. Nëse autoriteti i huaj vendimmarrës nuk do të pranojë kërkesën, apo do të kërkojë të dhëna shtesë, Komisioni do të informojë menjëherë parashtruesin e kërkesës.
3. Komisioni do të sigurohet që kërkesa zyrtare për kompensim e dërguar tek autoriteti i huaj vendimmarrës do të bëhet në formularin e caktuar nga autoriteti i atij shteti.
4. Kërkesa bashkë me dokumentet përcjellëse do të dërgohen në një nga gjuhët zyrtare të shtetit të cilit i dërgohet kërkesa apo në një nga gjuhët zyrtare të BE të cilat shteti pranues ka deklaruar se mund t'i pranojë.
5. Nëse një autoritet i huaj vendimmarrës kërkon që një seancë dëgjimore apo intervistë e viktimës së krimit, dëshmitarit ose ekspertit të mbahet në Republikën e Kosovës, seanca dëgjimore apo intervista e tillë do të kryhet nga Komisioni, me kusht që personi që dëgjohej të pajtohet për seancën dëgjimore apo intervistën e tillë. Komisioni do t'i dërgojë një raport për seancën dëgjimore autoritetit të huaj vendimmarrës.
6. Nëse një autoritet i huaj vendimmarrës kërkon që seanca dëgjimore të kryhet përmes përdorimit të video-konferencës apo telekomunikimit, dëgjimi i tillë do të kryhet në bashkëpunim me komisionin, me kusht që personi i cili do të dëgjohej pajtohet për dëgjim të tillë.
7. Komisioni në rolin e autoritetit asistues, nuk duhet të bëjë vlerësimin e kërkesës së parashtruar për kompensim.
8. Veprimet e kryera nga Komisioni në rolin e autoritetit asistues, nuk mund të ankimohen dhe nuk mund të paraqesin bazë për kërkesë për kompensim të tarifave apo shpenzimeve nga parashtruesi i kërkesës apo autoriteti vendimmarrës i shtetit të huaj.
9. Në rastin kur autoriteti i huaj vendimmarrës nuk i njeht shtetasit të Republikës së Kosovës, me banim të përhershëm në Republikën e Kosovës, të drejtën në kompensim për shkak të shtetësisë që ai ka, Republika e Kosovës merr përsipër shqyrtimin e të drejtës në kompensim nga Programi për kompensimin e viktimave të krimit, në pajtim me dispozitat e këtij ligji.
10. Për të realizuar të drejtën nga paragrafi 9 i këtij neni, parashtruesi duhet të dokumentojë se kërkesa drejtuar autoritetit kompetent, është refuzuar mbi bazën e mosplotësisimit të kriterit të kërkuar në atë shtet lidhur me shtetësinë.
11. Parashtruesi nga paragrafi 9 i këtij neni, mund të paraqet kërkesë në pajtim me dispozitat e këtij ligji dhe vetëm për llojet e kompensimit të parapara me këtë ligj.

KAPITULLI VI

PROGRAMI PËR KOMPENSIMIN E VIKTIMAVE TË KRIMIT

Neni 36

Financimi i Kompensimit të Viktimave të Krimit

1. Programi për kompensimin e viktimave të krimit do të financohet nga Buxheti i Republikës së Kosovës për Ministrinë e Drejtësisë si pjesë e ligjit vjetor të buxhetit.

2. Programi për kompensimin e viktimave mund të financohet edhe përmes kontributeve vullnetare dhe donacioneve private në pajtim me Rregullat e Kontrollit dhe Menaxhimit Financiar.

3. Gjykata me shqiptimin e aktgjykimit dënues shqipton edhe taksën për kompensimin e viktimave si në vijim:

3.1. Departamenti i Përgjithshëm i Gjykatës Themelore, shumën prej njëzet (20) euro;

3.2. Departamenti i Krimeve të Rënda, shumën prej pesëdhjetë (50) euro;

3.3. Departamenti Special i Gjykatës Themelore në Prishtinë, shumën prej njëqind (100) euro.

4. Gjatë procesit të rregullt buxhetor të përcaktuar në Ligjin për Menaxhimin e Financave Publike dhe Përgjegjësitë, Ministria e Drejtësisë do të bëjë një kërkesë buxhetore për të financuar një linjë buxhetore për programin e kompensimit të viktimave të krimit. Kërkesa e Ministrisë së Drejtësisë do të ketë parasysh projeksionet për të hyrat e pritura nga paragrafi 3 i këtij neni, si dhe shpenzimet nga Programi për Kompensim nga vitet paraprake.

5. Niveli i ndarjeve buxhetore për programin e kompensimit të viktimave të krimit do të bëhet përmes proceseve të rregullta buxhetore, duke marrë parasysh të hyrat e pritura nga paragrafi 3 i këtij neni, kontributi i paguar në programin për kompensim sipas pezullimit të përkohshëm të procedurës penale, të hyrat nga shitja e pasurisë së paligjshme të konfiskuar, të hyrat nga dorëzania e konfiskuar në pajtim me ligjin si dhe nivelin e përgjithshëm të të hyrave të pritura buxhetore dhe kërkesave për financim nga Buxheti i Kosovës.

Neni 37 Raportimi Financiar

1. Si pjesë e kërkesës buxhetore sipas Ligjit për Menaxhimin e Financave Publike dhe Përgjegjësitë, Ministria e Drejtësisë do t'i dorëzojë Ministrisë së Financave një raport vjetor mbi:

1.1. numrin e përgjithshëm të parashtruesve të kërkesave;

1.2. numrin e parashtruesve të kërkesave që u është mohuar kompensimi;

1.3. numrin i parashtruesve të kërkesave që u është dhënë kompensimi;

1.4. shumën e kompensimit, të dhënë parashtruesve të kërkesave;

1.5. shpenzimet e Komisionit dhe programit nga vitet paraprake.

KAPITULLI VII REGJISTRAT PËR PARASHTRUESIT E KËRKESAVE DHE PËR VENDIMET E LËSHUARA

Neni 38 Mbajtja e regjistrave

1. Komisioni mban regjistrat për parashtruesit e kërkesës dhe për vendimet e lëshuara rreth kompensimeve. Përmbajtja e këtyre regjistrave rregullohet me udhëzim administrativ nga Ministria e Drejtësisë.

2. Regjistrat do të mbahen në raste individuale, secili i shënuar me numrin e saj vijues dhe numrin e lëndës.

3. Numri i lëndës është numri që i atribuohet rastit me dorëzimin e kërkesës në Ministrinë e Drejtësisë.

4. Ministria e Drejtësisë do të krijojë një bazë të digjitalizuar të të dhënave.

Neni 39
Ruajtja e informatave

1. Të gjitha dosjet e parashtruesve të kërkesave për kompensim do të ruhen në pajtim me afatet e parapara në legjislacionin përkatës në fuqi.
2. Kërkesat për kompensim, dëshmitë, ekspertizat dhe regjistrat janë të dhëna personale të ndjeshme e të cilat duhet të përpunohen dhe ruhen me konfidencialitet, në pajtim me legjislacionin përkatës në fuqi.

KAPITULLI VIII
TRANSFERIMI I KËRKESAVE DHE KTHIMI I MJETEVE TË MARRA
NË MËNYRË JO TË DREJTË

Neni 40
Transferimi i kërkesave

1. Kërkesat e përfituesit ndaj kryesit do të kalojnë, deri në lartësinë e kompensimit në Qeverinë e Kosovës në ditën e ekzekutimit të vendimit për njohjen e të drejtës për kompensim.
2. Me transferimin e kërkesës sipas paragrafit 1 të këtij neni, Qeveria e Republikës së Kosovës në raport me kryesin do të veprojë në cilësinë e përfituesit.
3. Avokatura Shtetërore do të ndërmerr veprimet e nevojshme zyrtare për realizimin e dëmshpërblimit, respektivisht kompensimit në pajtim me legjislacionin në fuqi.

Neni 41
Kthimi i mjeteve të marra në mënyrë jo të drejtë

1. Në rast të pranimit të informatës se kompensimi i përfituesit është bërë mbi bazën e të dhënave të rreme/falsifikuara apo çfarëdo mashtrimi të mundshëm me qëllim të realizimit të kërkesës për kompensim, Komisioni dhe çdo palë tjetër e interesuar duhet të informojë prokurorin e shtetit.
2. Përfituesi i kompensimit sipas këtij ligji, ka për obligim të informojë Komisionin në çdo kohë nëse pas marrjes së kompensimit apo deri në ekzekutimin e vendimit të Komisionit, përfituesi përfiton dëmshpërblim nga burimet tjera.

KAPITULLI IX
DISPOZITAT KALIMTARE DHE PËRFUNDIMTARE

Neni 42
Dispozitat kalimtare

1. Me hyrjen në fuqi të këtij ligji, shfuqizohet Ligji Nr. 05/L -036 për Kompensimin e Viktimave të Krimit.
2. Anëtarët e Komisionit me mandat të fituar para hyrjes në fuqi të këtij ligji, qëndrojnë në detyrë deri në skadimin e natyrshëm të mandatit të tyre.
3. Të gjitha kërkesat e proceduara para hyrjes në fuqi të këtij ligji, trajtohen me ligjin që është më i përshtatshëm për parashtruesin e kërkesës, në pajtim me vendimin e Komisionit për këtë çështje.
4. Viktimat dhe vartësit e tyre, të cilët nuk kanë mundur të realizojnë të drejtën në kompensim sipas ligjit të shfuqizuar, por të cilët plotësojnë kushtet për kompensim sipas këtij ligji, kanë të

drejtë të dorëzojnë kërkesat e tyre për shqyrtim nga Komisioni nëse konsiderojnë se plotësojnë kushtet sipas këtij ligji. Kërkesa nga ky paragraf nuk mund të paraqitet mbi bazën e ndryshimit në lartësisë së kompensimit me këtë ligj.

Neni 43
Aktet Nënligjore

Aktet nënligjore të parapara në këtë ligj nxjerrën brenda gjashtë (6) muajsh pas hyrjes në fuqi të këtij ligji.

Neni 44
Hyrja në fuqi

Ky ligj hyn në fuqi pesëmbëdhjetë (15) ditë pas publikimit në Gazetën Zyrtare të Republikës së Kosovës.

Ligji Nr. 08/L-109
14 tetor 2022

Shpallur me dekretin Nr. DL-321/2022, datë 28.10.2022 nga Presidentja e Republikës së Kosovës Vjosa Osmani-Sadriu

